

Pauro peba owera ie Iesu urubia aboto Korosai sabowa ato na-irowomidirotiti

*Kamade owera Pauro aboudo ie Korosai urubia
aboto*

¹ Mo masiro Pauro ie, nedi peba titi owera ro na-iamo mo ro nisioidiro. Nimo ata kimibiria mere neama Timoti nedi peba titi ro nou mutu nisioidiro-rido. Mo Iesu Keriso ro kotiodorai dubu to ararasoro ri, mo ubi Godi ro nemedea-ro nedi woko ro mo ro osioidiro ri.

² Kimibiria urubia Korosai sabowa ato na-orowomidiro nio Godi tarena urubia ie, kimibiria gabo ato koko se na-orowotoi, nedi peba titi ro nio aboto nimeiriai. Nio Iesu Keriso ro ta-gidabuai abora nio nou abato iateidiro. Wisa tato kiwarebai miro mutu nimo Abera Godi aboudo nio abato aise ba-miamotiti.

Eso owera niarotiti-do Godi aboto

³ Abera Naramu Iesu Keriso nu edi Abera ro Godi nou aboto sirio tau eso owera aise niarotiti-do nio sapuwo to.

⁴ Mabu neitiro umoro Epapara ro niwai-marō ibo nio Iesu Keriso sapuwo to ta-gimibiria-rimo. Ina ata mabu nou e, nio ro nirimagare tanaro tisioidirotiti-dumo imese sirio tarena kimibiria urubia aboto.

⁵ Abera Naramu Iesu edi Abera ro Godi, eso owera nou aboto aise niarotiti-do. Mabu nio ro kimibiria tanaro ina nirimagare tanaro nedi tanaro teibo ro na-isioidiro-madumo, abora nio

kimibiria tiamo ibo nio Godi ro meamea wisa Adiri sabowa ato timasogoro-die, ina noudo ie nedi tanaro teibo ro nio ro kisioidiro-ma. Keba urubia nio aboto na-gou-rimo Korosai sabowa to, nio neio ro mea owera Iesu Keriso sapuwo to ta-gimowauti-rimo.

⁶ Nedi morobise owera ro nio ro nato aise gimibiria-rimo. Nedi mea owera ro abora nou ro orobodorouti nedi duriomoro gebari ro nato. Nou erere duriomoro urubia ro na-imibiria-dumo, Godi ubi tanaro neio ro nou ri isioidirotiti-dumo, ina abora kimibiria urubia imese sirio toiti-dumo. Ina nedi atu sosoro tanaro ro nio abato neio ro ororosioidiro-dumo, kebase edi tau ato girorowai-rimo ioudo garatamuai-rimo. Nedi mea owera ro Godi edi wisa tato kiwarebai ro nou sapuwo to

⁷ nio aboto kebase Epapara ro gowou-ro, nio nou ro gitamudiro. Epapara neitiro nirimagare neama ie, nu Iesu Keriso wisa tato woko dubu e neitiro beda sosoro ra Iesu Keriso wisa tato woko dubu teibo ie. Nou ro neitiro bobo ato Iesu Keriso sowake nio abato mea se irohotiti.

⁸ Neitiro nou ro nimowauti-ma ibo nio ro Godi urubia nirimagare timati-dumo, nedi nirimagare ro Tarena Urrio ro imiotiti-die.

Pauro kararatoro owera ie Korosai urubia sapuwo to

⁹ Ina noudo ie nio sapuwo to owera neitiro ro edi tau ato na-nirorowai-rido, neitiro kararatoro nio sapuwo to sirio tau noudo outiti-dumo Godi aboto, kidiobuti modobo pua. Godi neitiro ro nou ri nararatorotiti-do, mabu neitiro ubi ie nio ro mea se umoro oi ri Godi ubi tanaro. Ina nou

se pua, neitiro ro Godi nou ri nararatorotiti-do nio nou ro muro iwaititi ri. Nio muro Tarena Urio ro ba-mitowoutiti, ibose umoro ba-mimio.

¹⁰ Neitiro ro ibose Godi a-nararatorotiti-do nio mea keremiro to orowomidiro rie, Abera Naramu sirio mino to kamade kowaititi sapuwo to, ibose nou masiro auna kowaititi sapuwo to. Ina meamea ota iopu beda sosoro isuwodutiti-dumo, ina nio aboudo meamea tanaro ibo kisuwoduti modobo ie. Ina Godi nio ro umoro mea se koi modobo ie.

¹¹ Abera Naramu Godi neitiro ro a-nararatorotiti-do nio nou ro pupuwo inaina aise imowaititi ri. Nou edi pupuwo korosa ro imese auna ia ie. Ina noudo ie mibo tau ato nio koko se kirimowotoi modobo ie, mea se keremasebidiro mutu,

¹² ibose eso owera se karo kamade mutu Abera Godi aboto. Nio Godi ro imese modobomodobo ta-giwaititi, Godi edi tarena urubia ro neio mutu, nou edi woroworo moro ro nato edi meamea tanaro ro na-iamo-die nio ro erere se kirahidimo aboto.

¹³ Nimo Abera Godi ro Satani edi duwoduwo maumo ro noudo ta-niapopo-ro. Nimo ro ubauba dubu ubi tanaro nou isioidiro-ri pua. Godi edi nirimagare mere ro edi kiwaboï maumo ro neito ta-niwodoro-ro nimo ro nou ubi tanaro se isioidiro rie.

¹⁴ Nimo Iesu ro ta-niapopo-ro, edi ubauba tanaro ro na-nisioidirotiti-mo nou ro imese moro to ta-nimatopeamuti.

Iesu Keriso imese auna ia ie

¹⁵ Godi paea urubia ro sosoro kiauri pua, ina Godi edi mere ro nou atu sosoro ie Godi mutu. Imese namabu sirio nou ro iaurititi.

¹⁶ Mabu Godi ro Iesu edi tu ro neito gisioidiro imese namabu sirio urubia ro idomari to na-iaurititi-dumo nedi sopu duriomoro ro nato, ibose Adiri sabowa ato kiauri tato namabu na-iamo-die. Ibose imese sirio urio awawo pupuwo mutu, neio imese Godi edi mere ro Iesu nou tu to mea se gisioidiro. Neio imese sirio se Iesu sapuwo to gisioidiro.

¹⁷ Imese namabu sirio Godi ro ohu rido tiaurititi-die. Iesu edi pupuwo ro neito imese namabu sirio nato na-iamotiti simara tanaro mutu mea se neido ororosoidiro-dumo.

¹⁸ Kimibiria urubia eputa dubu Iesu Keriso ie, nou edi urubia ro nou durupi ie. Iesu nou se ie keremiro mabu dubu. Godi edi mere ro nu keba dubu e pamo rido imese moro to gowameai-ro. Ina noudo ie imese sirio namabu ina imese sirio tanaro mutu nedi sopu duriomoro ro nato na-iamo neio eputa dubu nouse ie.

¹⁹ Mabu Godi ubi neito gowamo nou edi kimaragoidiro ro, nou edi ubi ro, ibose nou edi pupuwo korosa ro, Iesu ato iamor ie.

²⁰ Ina ibose Godi ubi neito gowamo nu simara mere neito emeiriai ri, nou durupi rido karima arawiriti ri ota kemowotowa ato nama-araburai-ri miro edea rie. Godi ro nedi gabo ro nou mabu ato gosioidiro nu ubi ie miro kedea nou ia aboudo urubia aboto, daro imese namabu sirio aboto Adiri sabowa ato, ibose sopu duriomoro ato, nou ro boso neito a-godo ri.

²¹ Kebase nio ro Godi nasa dubu to asorotiti-mo, mabu nio ro nu huru

emoworohotiti-mo. Nou sapuwo to nio abato ubauba kimaragoidiro auna se iamotiti, ibose ubauba tanaro auna se isioidirotiti-mo.

²² Kaupoti Godi ro iedi era ro neito gagodo mabu Iesu durupi rido karima na-gosuputi ota kemowotowa ato. Godi ro nedi tanaro ro nou mabu ato gosioidiro, nu ubi ie nio nou sosoro gabo ato imese tarena ia to korowotoi ata marea tato.

²³ Ina noudo ie nio koko se aise ba-dorowotoi, Iesu Keriso edi mea oweru ro nato, nio sipi imese moro to ba-diwodouti-mo. Godi ro edi na imasogoro-die mea oweru to edi na gowapotai-ro, nou aboudo modobo pua nio ata nakomu ata ro kimuruwouti, nio ro kamade mutu nou ba-demotoi-mo. Nedi mea oweru ro nou se ie ata tato ie duriomoro gebari ato urubia ro na-orowauti-dumo nou ro orobodorouti. Mo nouse ie mo ata sowake dubu e, nedi mea oweru ro urubia aboto mo ro nobodorouti.

Iesu urubia Pauro ro iwarebidirotiti

²⁴ Abora nedi tau ro nato mo ro ubauba temeteme nio sapuwo to niauri. Kaupoti nedi temeteme ro mo ro na-niauri, nou sapuwo to mo kamade noititi. Keriso ro edi temeteme ro na-iaurititi, sapuwo mo ro nedi temeteme ro ti-niauri nou urubia kiwarebai sapuwo to, nedi temeteme ro momuo se koroporeai aboto. Iesu simara urubia neio nou durupi ie.

²⁵ Mo Godi ro ta-narapoi-ro Iesu edi urubia ro neio sowake dubu to ararasoro ri. Mo Godi ro ta-narapoi-ro Iesu edi urubia ro neio sowake dubu to ararasoro ri, Godi edi oweru ro momuo se nio imowauti ri.

²⁶ Kibase nedi mea owera ro piro se ta-owamotiti, urubia aboto paease orowapotai pua. Kaupoti Godi ro nedi auna ia mea owera ro nou simara kimibiria urubia aboto abora towapotai-die.

²⁷ Nedi piro owera ro na-gowapotai-ro urubia sirio aboto nou ibo ie, Nio Iu owera karo tato urubia Keriso owera na-imibiria-dumo, Keriso nio niro turi ato abora tomidiro. Ina noudo ie nio morobise kimaragoidiro koko se irobidiro-dumo ibo nio nou mutu Adiri sabowa ato nou edi auna woroworo ro nato ama-irowomidiro-ri.

²⁸⁻²⁹ Neibi ro Iesu sapuwo to aise norowautiti-bimo urubia aboto, ina neibi ro neio auna se nimadoweretiti-bimo. Ibose neio neibi ro mea muro to nitamudirotititi-bimo. Mabu neibi ubi ie neio kimibiria maumo to kimesebea ina Godi aboto kiwabo. Mo ro nedi woko ro pupuwo to nou ri nisioidirotititi. Keriso edi auna pupuwo korosa ro mo pupuwo nou ro nowaititi sirio tau bibiri nou ri nasibowadotiti urubia abato. Mabu mo auna ubi ro owamotiti ibo etio ra Keriso gomo ato na-iateidiro, neio imese meana amadimo-oi-ri, saiki ata Godi sosoro gabo ato ama-orowotoi-ri.

2

¹ Mo ubi ie nio kimowapotai ibo mo ro auna woko nisioidirotititi Korosai urubia nio sapuwo to, Raodesia urubia mutu, ibose mo sosoro kiauri tato urubia neio mutu.

² Mo ro nedi woko ro nou ri nisioidirotititi mabu mo ubi ie nio imese sirio se pupuwo oi rie kimibiria mutu. Ibose mo ubi ie nio imese sirio se nirimagare keremati. Idaibo tanaro nio ro

namadimi-isioidiro-ri, nio kaupoti urubia to amadima-ararapoi-ri, taie mea umoro auna se nio aboto Godi ro nato amadi-emagagai-ri. Nou ro piro se na-gowopirowa, mo ubi ie nio imese umoro koi, ibo Keriso nouse ie.

³ Iedi mea umoro ro mea muro mutu Godi ro Iesu Keriso abato giwopirowa, nou abato kowea ie.

⁴ Nedi peba titi owera ro mo ro nou ri nisioidiro mabu mo ubi tato ie nio arua urubia ro kisaubuti bagea owera to. Neio ro owera meamea to amadimi-itamudiro-ri kaupoti aise imibiria mamo.

⁵ Mo nio aboudo muso sekere kaupoti mo urio nio mutu e. Nio tanaro mutu mea mino to ou-dumo, ibose nio kimibiria Keriso sapuwo to imese kokoho ta-geremowaititi-rimo. Mo ro idaibo owera na-nirorowai mo imese auna kamade ro nowati.

Orio keremiro Iesu aboudo ou-die

⁶ Ina noudo ie Iesu Keriso nio ro Abera Naramu to beda sosoro gapoi-rimo, nio nou urubia sosoro gi-orowomidiro-ri.

⁷ Keriso mea goto sosoro ie, nou ato se sipi koko se diwodoro-mo, ota mea se mosuruwo-rimo. Moto kididi woko beda sosoro ra, nio keremiro idaibo sosoro ie, aise deremari-mo Iesu Keriso edi pupuwo ro neito. Nio edi kimibiria owera ro kebase na-garatomudiro-rimo, nou aboudo koko se ba-dirarebidiro-mo. Ina ibose sirio tau Abera Godi aboto eso owera aise gi-aro-ri.

⁸ Mea se deremowotoi-mo! Nio modobo pua arua urubia ro kirobo mabu neio edi kitamudiro ro neido ata meana ata osuruwo-ri pua, sopu

duriomoro edi kimaragoidiro ro neio ro nouto isioidiro-titi-dumo. Neio ro edi tanaro ro na-isioidiro-titi-dumo, sopu duriomoro urubia aboudo se gimade-rimo. Ibose nedi sairo rudo koromudidiro kitamudiro ro toboro ato edi ubauba urio ro oroho-dumo neio aboudo gimade-rimo. Nedi kitamudiro sirio ro Iesu Keriso aboudo pua. Nio modobo pua arua urubia ro kisaubuti,

⁹ mabu Godi edi asaso ro imese Keriso ia durupi maumo ato imidirotiti.

¹⁰ Nio Keriso abato kaupoti to na-garadabuai-rimo, morobise keremiro gabo nio abato momuo se towamo. Iesu Keriso nouse ie eputa dubu, imese sirio urio awawo pupuwo mutu neio imese Keriso ro sopu to iauri-die.

¹¹ Nio Iesu Keriso ro na-gidabuai, nio idaibo sosoro ie dubu simara takamai urio to ta-giwasio ina ta-giworiouti. Ibo pua tu to paea dubu ro kosioidiro. Io Iesu Keriso ro urio to gisioidiro nedi tanaro ro. Keriso ro nio simara ubauba ubi kibodoro aboudo imese ta-giwagare-ro.

¹² Nio obo to edi tau ato giwarumiauti, io idaibo sosoro ie nio pamo durupi bobo ato girobu Iesu mutu. Ina ibose nio obo maumo rido edi tau ato giwouburio-rimo, nio Iesu mutu bobo rido atu se ibose to giwoubua-ro. Idaibo tanaro neio ro gorosioidiro-rimo nio aboto, mabu nio ro ta-gimibiria-rimo ibo Godi edi pupuwo korosa ro modobo ie idaibo tanaro kisioidiro aboto. Nedi atu pupuwo korosa ro Iesu pamo rido Godi ro neito gowoubua-ro.

¹³ Nio ia urio kebase pamo urubia sosoro irobotiti, ubauba tanaro sirio na-isioidiro-titi-mo,

ibose durupi ubauba ubi sirio na-ibodorotiti-mo. Ina nio Godi ro Iesu mutu pamo rido atu se ta-giwoubua-ro orio keremiro ta-gomidai-rimo. Nimo ro ubauba tanaro na-nisioidirotiti-mo, Godi ro imese moro to ta-nimatopeamuti.

¹⁴ Nou idaibo sosoro ie, nimo ubauba tanaro na-nisioidirotiti-mo ata buka towamo nimo masiro mutu. Nimo ro ubauba wisa Godi aboudo ba-nimadetiti-mo. Ina idaibo sosoro ie, nimo ubauba beda buka ato iamotiti, iedi buka ro Godi ro ta-gemopoguti ota kemowotowa ato.

¹⁵ Keriso edi tau ato gemopoguti-rimo, imese pupuwo orora sirio iedi kemowotowa ro neito neio Godi ro ta-giwamedei, imese siripo ta-giwai urubia sirio sosoro gabo ato.

Karasaubuti sabi ibodoro mamo

¹⁶ Ina noudo ie nio modobo pua arua urubia oweri kirowidiro ibo, 'Nedi ohona ro iho mamo, idaibo obo idio mamo.' Neio nio kimeiouiti urubia pua ibo na-imowauti-dumo, 'Iu urubia soriomu tanaro ibo ba-disioidiro-mo, orio sogomi kohau tanaro ibo ba-disioidiro-mo, ina Iu urubia komidiro saiki tanaro ibo ba-disioidiro-mo.'

¹⁷ Nedi tanaro sirio ro kowaroho duwoduwo sosoro gorowapotai-ro, kaupoti kowaroho duwoduwo ro gabo gemosowa-ro nani ia dubu saro rido gou-ro. Morobise maumo tanaro edi dubu abato na-iamo Keriso nou se ie.

¹⁸ Nio modobo pua arua urubia ro ubauba kiwaititi. Mea se. Ina arua urubia amadidimi-irurubua-ri nio neio ro amadimi-igediouti-ri, ina nio ro iedi mea kimibiria wisa ro nato amadimi-iasoperai-ri.

Nedi sabi sirio ro urubia ro nakara se na-isioidiro-dumo, nedi urubia ro bagea to korowororuwo ie sopu to, neio urubia ro imowabu rie. Ina neio ro sowake urio imowabu-dumo. Ibose neio ro urubia auna se kimowauti ie tuturu tau to beda tanaro ra hiwo to na-iaurititi-dumo. Iedi mabu noudo ie neio ohu to korowiourio. Kaupoti neio ro edi tanaro ro na-isioidirotiti-dumo imese ata mabu tato tanaro isioidirotiti-dumo ina neio auna keremowabu e.

¹⁹ Idaibo sosoro urubia neio mea se irarebai pua, Iesu urubia eputa dubu Keriso aboudo. Keriso durupi nouse ie, urubia nou pupuwo to iroromowadotiti. Eputa Keriso nou se ie, sumi pupuwo nou aboudo irobu-die, durupi pupuwo nou ro kowaititi ie, woko pupuwo to nato kisioidiro ie. Durupi kororomai sapuwo to edi pupuwo ro Godi aboudo outiti-die.

²⁰ Nio idaibo sosoro ie, Keriso mutu atu se ta-gorowaburai-rimo. Ina nio nou ro nedi sopu duriomoro ro nato edi ubauba orora ro na-woroho-dumo nio Keriso ro neio aboudo ta-giwagare-ro. Ina noudo ie, mabu boira nio duriomoro urubia sosoro korowomidiro? Mabu boira neio ro edi sabi oweru ro neito na-itamudiro-dumo, ina nio ro na-ibodoro-dumo?

²¹ Neio ro ibo na-itamudiro-dumo, 'Nedi namabu ro nio ro iworohuti mamu, nedi ohona ro iho mamu! Nedi namabu ro iwaseidiro mamu.'

²² Nedi namabu ro sopu duriomoro namabu e, tuturu to iamo-ri pua, neio urubia ro kiworohuti ato amadimo-oroporeawado-ri. Nedi sabi sirio ro sopu urubia ro nakara se gisioidiro-rimo nio

ro ibodoro ri.

²³ Ina urubia ro ibo imaragoidirotiti-dumo, sabi kibodoro gabo mea muro gabo ie. Kaupoti neio edi kitamudiro ro urubia aboudo gimade-rimo, ibo pua Godi aboudo kimade. Nedi urubia ro koko tanaro isioidiro-dumo Godi kamade kowaititi sapuwo to, ibose bagea to korowororuwoidiro ie sopu to neio urubia ro imowabu rie. Idaibo urubia sabi na-ibodoro-dumo neio durupi nakara se ubauba iworoho-dumo. Mabu nedi sabi sirio ro urubia ro kibodoro ato, durupi ubauba ubi tanaro sirio na-iamo, sabi kibodoro tanaro ro neio kidiobuti modobo pua.

3

Godi kamade kowaititi sapuwo to duriomoro ato mea se gi-orrowomidiro-ri

¹ Nio Keriso mutu urio to Godi ro atu se giwoubua-ro, ina nio abora keremiro mutu e. Ina noudo ie beda meamea tanaro ro iamo-die Abera Godi tumodi sapuwo ato Keriso edi moro ato omidiro-die, nio giropu neio ato se miamo,

² ibose nio kimaragoidiro patu iato se miamo. Duriomoro tanaro sapuwo to auna se imaragoidiro mamo.

³ Mabu nio neio sapuwo to Iesu mutu ta-gorowaburai-rimo. Nio keremiro Keriso ro Godi aboto ta-gidabuai mea mino to giwopirowa.

⁴ Keriso edi tau ato namadi-orrowapotai-ri, nio orio keremiro edi na aboudo na-imade-dumo, piro se nou abato na-orrowomidiro, saiki ata urubia sirio ro nio nato amadimi-iauri-ri mea ia sosoro mutu ata pokiri iopu tato ie.

⁵ Ina noudo ie ubauba ubi tanaro nio niro turi ato na-iamo ba-diopiauti-mo. Nedi sopu duriomoro ubi tanaro ro nu neio ie, upo tanaro, imese marea ia tanaro kisioidiro. Ina ata ibo ie auna ia ubi ro kowamo ie upo koroho, ina ata nou e arua ubauba tanaro kisioidiro aboto kimaragoidiro, auna ubi ie namabu siriosirio korowomidiro. Namabu sirio sogoi ro kiwati tanaro ibo ie Godi huru kemowou e, ina namabu aboto se kimaragoidiro ie.

⁶ Nedi ubauba tanaro sirio ro urubia ro na-isioidiro-dumo, ina noudo ie tau tou-die saiki ata Godi edi serawo ro neio ro amadimo-owea-ri.

⁷ Nio ro idaibo ubauba tanaro kebase nou isioidirotiti-mo.

⁸ Kaupoti idaibo ubauba tanaro sirio nio ro aise ba-dimeserai-mo. Nedi ubauba tanaro sirio neio idaibo ie, serawo aise koititi, arua urubia masawe kimati, arua urubia sapuwo to ubauba kimaragoidiro kiworohuti, arua urubia oweru kimsaubuti. Karo tato oweru nio matagoro rido dorogora se osuwoduti mamo arua urubia sapuwo to.

⁹ Bagea oweru eremowauti mamo, mabu nio tagara keremiro simara ubauba tanaro mutu ta-gipuruti-rimo,

¹⁰ Ina orio keremiro orio obotama beda sosoro ra ibo giroiti-rimo. Iedi orio keremiro ro Abera Naramu Godi nou ro orio aise imowaititi. Nio nou ro imododiai nou sosoro oititi ri, ina noudo ie nio morobise to umoro tiwaititi-die.

¹¹ Nedi orio keremiro ro nou maumo ato dubu simara takamai kasiai o kasiai tato, Iu urubia ra o Iu oweru karo tato urubia ra, io auna tanaro pua. Neio daimodaimo urubia ra, tumu urubia

ra, wisa tato woko kisioidiro urubia ra, simara woko kisioidiro urubia ra, io auna tanaro pua, nedi duriomoro gebari ro nato Keriso nou se ie neio auna dubu e. Nou ro imidirotiti imese kimibiria urubia niro maumo ato.

Meamea tanaro se gi-isioidiro-ri, auna se nou e nirimagare kimati

¹² Nio Godi ro ta-gihoduti nou tarena urubia to ararasoro ri. Ina noudo ie orio obotama nio ro beda sosoro kiroiti ra, meamea tanaro nio ro ibo kiroidiro modobo ie. Nio Godi ro auna nirimagare imatiti-die ina noudo ie nio ro urubia nirimagare ibo kimati modobo ie. Urubia aise gi-iwarebai-ri. Nakara se sopo to aise gi-orowororuoidiro-ri. Urubia aise gi-imaragoidiro-ri. Serawo samo to oititi mamu.

¹³ Kimibiria borubi ro nio aboto kimaragoidiro tato tanaro na-isioidiro-dumo, auna se imaragoidiro mamu. Mibo na-iamo arua urubia mutu tuturu tau to iamu mamu, samu to gi-iporeawado-ri ina imiriauti mamu. Nio edi ubauba tanaro sirio ro Abera Naramu ro woki beda sosoro to gimati, nio ro arua urubia ubauba nio aboto na-gisioidiro-rimu woki ibo kimatiti modobo ie.

¹⁴ Ina auna tanaro owamu ibo urubia nirimagare aise gi-imati-ri, nou kiroidiro modobo ie. Nio ro idaibo tanaro namadimi-isioidiro-ri nio kaupoti to ama-irowomidiro-ri.

¹⁵ Nio Godi ro girapoi-ro kaupoti durupi to ararasoro ri. Keriso ro miro nio abato ta-gedea, ina nou edi miro ro nio nou ro kitowouti modobo ie, eso owera karo mutu.

¹⁶ Sirio saiki Keriso edi mea oweru ro nio niroturi ato aise ba-miamotiti. Iedi oweru ro neito nio ro borubi kimibiria urubia mea muro to ba-ditamudiro-mo ina ba-dituputuwado-mo. Nio ro Godi erere kemowabu ohare to eso oweru maumo giropu rido ba-demaboduti-mo.

¹⁷ Nio ro etou tanaro kisioidiro ra ibose beda oweru karo ra Abera Naramu Iesu ubi to kisioidiro modobo ie. Sirio tau eso oweru karo modobo ie nimo Abera Godi aboto. Mabu Iesu ro gabo kebase ta-gosioidiro Godi aboto nimo ro eso oweru nou aboto aro ri.

Kimibiria urubia korowomidiro muro ibo ie

¹⁸ Uramio mutu mamio oweru nio aboto ibo ie, uramio oweru se kirowidiro modobo ie. Mabu Abera Naramu kowasoro maumo ato nou mea tanaro ie.

¹⁹ Uramio oweru nio aboto ibo ie, upi nirimagare aise gi-imati-ri, auna oweru to irubiauti mamu.

²⁰ Merebusere oweru nio aboto ibo ie, imese sirio tau mamio abeamio oweru aise gi-irowidiro-ri. Mabu nio ro idaibo tanaro namadimi-isioidiro-ri, Abera Naramu nio ro kamade amadimo-owaititi-ri.

²¹ Abeamio oweru nio aboto ibo ie, merebusere inaina masawe oweru to irubiauti mamu. Ido neio tere amadimo-oi-ri meamea tanaro kisioidiro aboto.

²² Wisa tato woko urubia, oweru nio aboto ibo ie. Eputa urubia sopu duriomoro ato na-orowomidiro, imese sirio tau neio oweru aise gi-irowidiro-ri. Ibo pua neio sosoro gabo ato se kisioidiro woko mea se, neio kamade kiwaititi sapuwo to. E e, imese sirio tau woko mea se gi-isioidiro-ri morobise giropu mutu, mabu nio

ro Abera Naramu auna se
emaragoidiro-titi-dumo.

²³ Nio ro beda woko kisioi-di-ro ra, kamade
mutu gi-osioi-di-ro-ri. Nio ro idaibo Abera
Naramu woko emesioi-di-ro-dumo, nou idaibo ie
nio ro sopu duriomoro urubia woko imesioi-di-ro
pua.

²⁴ Dimaragoidiro-mo, saiki ata erere se edina
gimohoduti Abera Naramu ro, nio ro nou
amadimi-imade-ri. Nio nani ia eputa dubu nou
woko na-emesioi-di-ro-dumo Keriso nou se ie.

²⁵ Kaupoti nio ata ro ubauba tanaro ata
na-osioi-di-ro, ibose ubauba wisa Godi aboudo
nou ro ama-imidai-ri. Mabu Godi ro urubia atu
sosoro tanaro to kiworohuti ie.

4

¹ Eputa urubia, owera nio aboto ibo ie. Nio ro
modobo ie wisa tato woko urubia mea tuputupu
mino to kiworohuti. Mabu nio umoro ie ibo nio
eputa dubu Adiri sabowa ato tomidiro-die.

Ina arua umoro owera

² Sirio tau aise gi-eremododiai-ri Godi
kararatoro tau ato nimo urio modobo pua norou
kirobuti, eso owera sirio tau aise gi-aro-ri Godi
aboto.

³ Nio ro ibose modobo ie neibi sapuwo to Godi
kararatoro nou ro gabo odobura ri urubia neibi
ro imowauti ri mea owera Iesu Keriso sapuwo
to. Nedi mea owera ro keba se piro se
ta-owamotiti, urubia sirio ro umoro oi pua. Mo
dibura ato abora nou ri noroho mabu nedi
owera ro nou nimowautiti.

⁴ Ibose Godi ba-dararatoro-mo, mo ro modobo ie nedi mea owera ro mea mino to kimabuti. Nou ubi beda sosoro owamo-die mo ro idaibo mino to kosioidiro modobo ie.

⁵ Kimibiria tato urubia aboto muro tanaro se disioidiro-mo. Nio komidiro keremiro imese sirio tau mea se keremododiai modobo ie, Keriso edi meamea tanaro ro kiwawuti kimibiria tato urubia aboto.

⁶ Nio owera keremowauti ato kimibiria tato urubia mutu, muro owera kimaragoidiro mutu gi-eremowauti-ri. Nio edi owera to keremowauti ra modobo ie neio ro kamade mutu kirowidiro. Ina noudo ie nedi urubia ro nio aboto kemodowa owera mutu koroho ato, mea owera sapuwo to, nio abato mea muro wisa owera kiamo ie.

Pauro aboudo iana umoro owera

⁷ Tikikasi, nio aboto mo ro nemeiriai nio iraturiomai ri, nio owera mo sapuwo nou ro ama-imowauti-ri. Nou nimo kimibiria neama ie nirimagare tinematiti-dumo. Nu Iesu Keriso wisa tato woko dubu e, nedi woko ro neibi ro atu se morobise to ibo nosioidiro-birimo.

⁸ Tikikasi nio aboto nou mabu ato nemeiriai nio umoro iwai ri ibo neibi abato beda tanaro ro gororosioidiro-rimo, ibose nio pupuwo kiwaititi aboto.

⁹ Tikikasi ra Onesima ra nio aboto amadido-ou-ri. Onesima nimo morobise kimibiria niama ie nu nimo ro nirimagare tinematiti-dumo. Nu nio simara dubu e. Imese sirio tanaro nato na-gororosioidiro-dumo neio sapuwo to nio neitiro ro umoro amadi-iwai-ri.

¹⁰ Mo boinana dibura dubu Arisitaka ibose Mareko, Banabasi edi neama ro kamade owera

neitiro ro emeiriai-do nio aboto. Mo umoro ie nio ro pupuwo owera Mareko sapuwo to ta-girorowai-rimo. Nou korowateai ato nio aboto, ba-daramairiai-mo.

¹¹ Ata dubu Iosua nu ata masiro Iasitisi nu ibose nio aboto kamade owera emeiriai-die. Mo mutu iedi urubia sirio ro Godi edi kiwaboi tanaro sapuwo to woko na-emesioidiro-dumo, neio aboto nedi dubu Peteibi ro neibi se ie Iu urubia. Mo edi mibo maumo ro nato na-nimidirotiti neibi ro toutou ta-nowai-birimo.

¹² Ibose Epapara ro emeiriai-die kamade owera nio aboto, nou nio simara dubu e, ibose Iesu Keriso wisa tato woko dubu e. Nou ro sirio tau nio sapuwo to Godi pupuwo to araratorotiti, nou ubi ie nio koko se irimowotoi ri Godi ubi gabo ato, ibose kimibiria sapuwo to nio iroromai ri, ina morobise umoro kiworohuti Godi ubi gabo nio sapuwo to beda sosoro iamo.

¹³ Epapara mo ro simara idomari to ta-niauri ibo nou ro awawo kiwarebai tanaro tisioidirotiti nio sapuwo to. Ibose Raodesia sabowa kimibiria urubia sapuwo to, Hera Sabowa kimibiria urubia mutu, neio sapuwo to awawo kiwarebai tanaro nou ro tisioidiro.

¹⁴ Nimo ata namutuna Dokota Ruka nirimagare na-nematiti-dumo, Demasi mutu neitiro ro ibose kamade owera emeiriai-do nio aboto.

¹⁵ Mo kamade owera nio ro ba-demaiwai-rimo kimibiria namuturubi aboto Raodesia sabowa ato na-orowomidiro. Ibose mo kamade owera nedi orobo ro Nimipa nou aboto ba-demaiwai-rimo. Ibose Iesu urubia etio ro iradabutiti-dumo nou moto ato, mo kamade owera neio aboto ba-demaiwai-rimo.

¹⁶ Nedi peba titi owera ro nio aboto kioputi nama-ororoporeai-ri, ito ba-diowou-mo Iesu urubia Raodesia sabowa ato na-orowomidiro, nedi owera ro neio ro ba-mioputi-mo. Ibose mo ro edi peba titi ro nimeriai Raodesia urubia aboto, modobo ie nio ro nedi peba titi ro ba-dimoputi-mo.

¹⁷ Iedi dubu ro nio abato na-omidiro Akipasi nou ba-demowapotai-mo ibo, Abera Naramu ro beda woko gomia, mea se nou se ba-mosioidiro womu tato koporeai.

¹⁸ *Nedi kamade owera ro mo simara tu to nisioidiro nio aboto, mo peba titi kiatiti mino ibo ie. Pauro. Woki emati ate mo seni mutu dibura ato na-nirohotiti. Godi edi wisa tato nirimagare ro nio abato ba-mowamotiti.
Taie nou se ie.*

Tareka Buka
Portions of the Holy Bible in the Bamu language of
Western Province, Papua New Guinea
Buk Baibel long tokples Bamu long Niugini

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4